

玄門日誦

玄門日誦早課

早  
課

第 2 頁

玄門日誦

玄門日誦

上壇行教 依上和音

一體同觀 功德無量

澄清韻

琳瑯振響。十方肅清。河海靜默。

山嶽含煙。萬靈振伏。招集群仙。

天無氛穢。地無妖塵。冥慧洞清。

大量玄玄。

大羅三寶天尊（三稱）

# 吊掛

真心清靜道爲宗。譬彼中天寶月同。  
淨掃浮雲無點翳。一輪光滿太虛空。  
上藥身中神氣精。人人具足匪虧盈。  
能知混合回風道。金鼎黃芽日日生。  
香供養常清靜天尊

(主) 一炷真香本自然 黃庭爐內起祥烟

(二) 空中結就浮雲篆 上祝當今壽萬年

(三) 道場衆等人各恭敬

恭對道前 諷經如法

提綱

(主) 群仙朝上帝 元始降洪恩

(二) 大衆登寶殿 諷誦太上經  
手

淨心神咒

太上台星 應變無停 驅邪縛魅

保命護身 智慧明淨 心神安寧

三魂永久 魄無喪傾

淨口神咒

丹朱口神 吐穢除氛 舌神正倫

通神養神 羅千齒神 卻邪衛真

喉神虎賁 氣神引津 心神丹元

令我通真 思神鍊液 道炁常存

淨身神咒

靈寶天尊 安慰身形 弟子魂魄

五臟玄冥 青龍白虎 隊仗紛紜

朱雀玄武 待衛我真

安土地咒

元始安鎮 普告萬靈 嶽瀆真官  
土地祗靈 左社右稷 不得妄驚  
回向正道 內外澄清 各安方位  
備守壇庭 太上有命 搜捕邪精  
護法神王 保衛誦經 皈依大道  
元亨利貞

淨天地神咒

天地自然。穢氣分散。洞中元虛。  
晃朗太元。八方威神。使我自然。

靈寶符命。普告九天。乾囉怛那。  
洞罡太玄。斬妖縛邪。度鬼萬千。  
中山神咒。元始玉文。持誦一遍。  
卻病延年。按行五嶽。八海知聞。  
魔王束首。侍衛我軒。凶穢消散。  
道炁常存。

祝香咒

道由心學。心假香傳。香熱玉爐。  
心存帝前。真靈下盼。仙旆臨軒。

令臣關告。逕達九天。

金光神咒

天地玄宗。萬炁本根。廣修億劫。  
證我神通。三界內外。惟道獨尊。  
體有金光。覆映吾身。視之不見。  
聽之不聞。包羅天地。養育群生。  
誦持萬遍。身有光明。三界侍衛。  
五帝司迎。萬神朝禮。役使雷霆。  
鬼妖喪胆。精怪亡形。內有霹靂。

雷神隱名。洞慧交徹。五炁騰騰。  
金光速現。覆護真人。

玄蘊咒

雲篆太虛。浩劫之初。乍遐乍邇。  
或沉或浮。五方徘徊。一丈之餘。  
天真皇人。按筆乃書。以演洞章。  
次書靈符。元始降下。真文誕敷。  
昭昭其有。冥冥其無。  
沉疴能自痊。塵勞溺可扶。

幽冥將有賴。由是昇仙都。

太上老君說常清靜經

老君曰。大道無形。生育天地。大道無情。運行日月。大道無名。長養萬物。吾不知其名。強名曰道。夫道者。有清有濁。有動有靜。天清地濁。天動地靜。男清女濁。男動女靜。降本流末。而生萬物。清者濁之源。動者靜之基。人能常清靜。天地悉皆歸。夫人神好清。

而心擾之。人心好靜。而慾牽之。常能  
遣其慾。而心自靜。澄其心而神自清。  
自然六慾不生。三毒消滅。所以不能者  
。爲心未澄。慾未遣也。能遣之者。內  
觀其心。心無其心。外觀其形。形無其  
形。遠觀其物。物無其物。三者既悟。  
唯見於空。觀空亦空。空無所空。所空  
既無。無無亦無。無無既無。湛然常寂  
。寂無所寂。慾豈能生。慾既不生。即

是真靜。真常應物。真常得性。常應常  
靜。常清靜矣。如此清靜。漸入真道。  
既入真道。名爲得道。雖名得道。實無  
所得。爲化衆生。名爲得道。能悟之者  
。可傳聖道。

老君曰。上士無爭。下士好爭。上德不  
德。下德執德。執著之者。不名道德。  
衆生所以不得真道者。爲有妄心。既有  
妄心。即驚其神。既驚其神。即著萬物

。既著萬物。即生貪求。既生貪求。即  
是煩惱。煩惱妄想。憂苦身心。便遭濁  
辱。流浪生死。常沉苦海。永失真道。  
真常之道。悟者自得。得悟道者。常清  
靜矣。仙人葛翁曰。吾得真道。曾誦此  
經萬遍。此經是天人所習。不傳下士。  
吾昔受之於東華帝君。東華帝君。受之  
於金闕帝君。金闕帝君。受之於西王母  
。西王母。皆口口相傳。不記文字。吾

今於世。書而錄之。上士悟之。昇爲天  
官。中士修之。南宮列仙。下士得之。  
在世長年。遊行三界。昇入金門。左玄  
真人曰。學道之士。持誦此經者。即得  
十天善神。擁護其身。然後玉符保神。  
金液鍊形。形神俱妙。與道合真。正一  
真人曰。人家有此經。悟解之者。灾障  
不干。衆聖護門。神昇上界。朝拜高真  
。功滿德就。相感帝君。誦持不退。身

騰紫雲。

太上老君說常清靜經。

玉清寶誥

志心皈命禮

三界之上。梵炁彌羅。上極無上。  
天中之天。鬱羅蕭台。玉山上京。  
渺渺金闕。森羅淨泓。玄元一炁。  
混沌之先。寶珠之中。玄之又玄。  
開明三景。化生諸天。億萬天真。  
無鞅數衆。旋斗歷箕。回度五常。

巍巍大範。萬道之宗。大羅玉清。  
虛無自然。至真妙道。元始天尊。

上清寶誥

志心皈命禮

居上清境。號靈寶君。祖劫化生。九萬  
九千餘梵炁。赤書煥發。六百六十八真  
文。因混沌赤文。而開九霄。紀元洞玉  
歷而分五劫。天經地緯巍乎造化之宗。  
樞陰機陽。卓爾雷霆之祖。大悲大願。  
大聖大慈。玉宸道君。靈寶天尊。

太清寶誥

志心皈命禮

隨方設教。歷劫度人。爲皇者師。帝者師。王者師。假名易號。立天之道。地之道。人之道。隱聖顯凡。總千二百之官君。包萬億重之梵炁。化行今古。著道德凡五千言。主握陰陽。命雷霆用九五數。大悲大願。大聖大慈。太上老君道德天尊。

玉帝寶誥

志心皈命禮

太上彌羅無上天。妙有玄真境。渺渺紫  
金闕。太微玉清宮。無極無上聖。廓落  
發光明。寂寂浩無宗。玄範總十方。湛  
寂真常道。恢漠大神通。玉皇大天尊。  
玄穹高上帝。

天皇寶誥

志心皈命禮

紫微宸極。勾陳天宮。九光寶苑之中。  
五炁玄都之上。體元皇而佐司玄化。總  
兩極而共理三才。主持兵革之權衡。廣

推大德。統御星辰之纏次。毋失常經。  
上象巍峨。真元恢漠。大悲大願。大聖  
大慈。勾陳上宮。天皇大帝。  
星主寶誥 志心皈命禮

大羅天闕。紫微星君。尊居北極之高。  
位正中天之上。佛號金輪熾盛。道稱玉  
斗玄尊。璇璣玉衡齊七政。總天經地緯  
。日月星宿約四時。行黃道紫垣。萬象  
宗師。諸天統御。大悲大願。大聖大慈

。萬星教主。無極元皇。中天紫微。北極大帝。

后土寶誥

志心皈命禮

九華玉闕。七寶皇房。承天稟命之期。主陰執陽之柄。道推尊而含弘廣大。德敷蓄於柔順利貞。效法昊天。根本育坤元之美。流形品物。生成施母道之仁。嶽瀆是依。山川咸仗。大悲大願。大聖大慈。承天效法后土皇地祇。

普化寶誥

志心皈命禮

九天應元府。無上玉清王。化形而滿十方。談道而跌九鳳。三十六天之上。閱寶笈考瓊書。千五百劫之先。位上真權大化。手舉金光如意。宣說玉樞寶經。不順化作微塵。發號疾如風火。以清靜心。而弘大願。以智慧力。而伏諸魔。總司五雷。運心三界。群生父。萬靈師。大聖大慈。至皇至道。九天應元雷聲。

普化天尊。

土地咒

經壇土地。神之最靈。昇天達地。  
出幽入冥。爲吾關奏。不得留停。  
有功之日。名書上清。向來早堂。  
誦經功德。上奉高真。下保平安。  
賜福消災。同賴善功。證無上道。  
一切信禮。志心稱念。

三皈依

稽首皈依無上道。自皈依無上道寶。當  
願衆生。常侍天尊。永脫輪迴。  
稽首皈依無上經。自皈依無上經寶。當  
願衆生。生生世世。得聞正法。  
稽首皈依無上師。自皈依無上師寶。當  
願衆生。學最上乘。不落邪見。  
早課功德。不可思議。諸天諸地衆神祇  
。國家壽夭齊。大道慈悲。萬化樂雍  
熙。

朝禮登寶座天尊大天尊（三稱）  
朝禮增福壽天尊大天尊（三稱）

玄門日誦晚課

晚  
課

玄門日誦晚課

步虛

大道洞玄虛。有念無不契。  
鍊質入仙真。遂成金剛體。  
超度三界難。地獄五苦解。  
悉歸太上經。靜念稽首禮。  
太上度人無量天尊。

吊掛

種種無名自苦根。苦根除盡善根存。  
但憑慧劍威神力。跳出輪迴五苦門。

道以無心度有情。一切方便是修真。  
若皈聖智圓通地。便是生天得道人。  
香供養太乙救苦天尊

一炷真香烈火焚。金童玉女上遙聞。  
此香逕達青華府。奏啓尋聲救苦尊。  
道場衆等。人各恭敬。  
正對道前。誦經如法。

提綱

天尊妙難量。人天度衆生。

存亡皆利濟。諷誦太上經。

玄蘊咒

寂寂至無宗。虛峙劫仞阿。

廓落洞玄文。誰測此幽遐。

一入大乘路。孰計年劫多。

不生亦不滅。欲生因蓮花。

超凌三界途。慈心解世羅。

真人無上德。世世爲仙家。

爾時

救苦天尊。徧滿十方界。常以威神力。  
救拔諸衆生。得離於迷途。衆生不知覺。  
。如盲見日月。我本太無中。拔離無邊  
際。慶雲開生門。祥煙塞死戶。初發玄  
元始。以通祥感機。救一切罪。度一切  
厄。渺渺超仙源。蕩蕩自然清。皆承大  
道力。以伏諸魔精。空中何灼灼。名曰  
泥丸仙。紫雲覆黃老。是名三寶君。還  
將上天炁。以制九天魂。救苦諸妙神。

善見救苦時。天上混無分。天炁歸一身。  
。皆成自然人。自然有別體。本在空洞  
中。空洞跡非跡。徧體皆虛空。第一委  
炁立。第二順炁生。第三成萬法。第四  
生光明。天上三十六。地下三十六。太  
玄無邊際。妙哉大洞經。歸命太上尊。  
能消一切罪。  
東方玉寶皇上天尊。  
南方玄真萬福天尊。

西方太妙至極天尊。

北方玄上玉宸天尊。

東北方度仙上聖天尊。

東南方好生度命天尊。

西南方太靈虛皇天尊。

西北方無量太華天尊。

上方玉虛明皇天尊。

下方真皇洞神天尊。

道言十方諸天尊。其數如沙塵。化行十

界。普濟度天人。委炁聚功德。同聲救  
罪魂。罪魂實可哀。我今說妙經。念誦  
無休息。歸身不暫停。天堂享大福。地  
獄無苦聲。火翳成清暑。劍樹化爲騫。  
上登朱陵府。下入開光門。超度三界難  
。逕上元始天。於是飛天神王。無鞅數  
衆。瞻仰尊顏。而作頌曰。  
天尊說經救。接引於浮生。勤修學無爲  
。悟真道自成。不迷亦不荒。無我亦無

名。朗誦罪福句。萬徧心垢清。爾時飛  
天神王。及諸天仙衆。說是誦畢。稽首  
天尊。奉辭而退。

爾時

元始天尊。在大羅天上。玉京山上。爲  
諸天仙衆。說此生天得道真經。告諸仙  
曰。吾今爲汝。畧啓身心。明宣道要。  
十方得道神仙。皆從此經修行。而通微  
奧。善男子。善女人。依憑齋戒。作是

津梁。一切有爲。顯諸真路。體此法相。  
。乃可受持。能屏衆緣。永除染著。外  
相不入。內相不出。於正念中。乃得五  
藏清涼。六腑調泰。三百六十。骨節之  
間。有諸滯礙。十惡之業。百八十煩惱  
之業。衆苦罪源。悉皆除蕩。即引太和  
真炁。注潤身田。五藏六腑。心目內觀  
真炁。所有清淨光明。虛白朗曜。杳杳  
冥冥。內外無事。昏昏默默。正達無爲

。古今常存。總持靜念。從茲解悟。道  
力資扶。法藥相助。仍節飲食。驅遣鬼  
尸。安寂六根。靜照八識。空其五蘊。  
證妙三元。得道成真。自然昇度。爾時  
諸天仙衆。上白天尊言。自從無始以來  
。至於今日。未聞如是。大乘經典。我  
等緣茲幸會。廣及一切。道果圓明。而  
說偈曰。  
杳杳冥冥清靜道。昏昏默默太虛空。

體性湛然無所住。色心都寂一真宗。

斗姆寶誥 志心皈命禮

西天竺國。大智光中。真空妙相法王師。  
。無上玄元天母主。金光燦處。日月潛  
輝。寶杵旋時。鬼神失色。顯靈蹤於塵  
世。衛聖駕於閻浮。衆生有難若稱名。  
大士尋聲來救苦。大悲大願。大聖大慈  
。聖德巨光天后。摩利支天大聖。圓明  
道姥天尊。

三官寶誥

志心皈命禮

唯三聖人。乃一太極。普受浩劫家之命。  
。鼎膺無量品之褒。紫微清虛洞陰。總  
領功過。賜福赦罪解厄。溥濟存亡。道  
冠諸天。恩覃三界。大悲大願。大聖大  
慈。三元三品。三官大帝。三宮九府。  
感應天尊。

呂祖寶誥

志心皈命禮

玉清內相。金闕選仙。化身爲三教之師

。掌法判五雷之令。黃梁夢覺。忘世上  
之功名。寶劍光騰。掃人間之妖怪。四  
生六道。有感必孚。三界十方。無求不  
應。黃鵠磯頭留聖蹟。玉清殿內煉丹砂  
。存芝像於山巖。顯仙蹤於古洞。闡法  
門之香火。爲後嗣之梯航。大悲大願。  
大聖大慈。開山啓教。靈應祖師。天雷  
上相。靈寶真人。純陽演正。警化孚佑  
帝君。興行妙道天尊。

邱祖寶誥

志心皈命禮

隱顯莫測。抱道無窮。腹養黃芽。鼎飛  
白雪。體靜潛而藏天地。心寂默而轉乾  
坤。妙奪陰陽。玄超無極。授金丹之至  
訣。普度後人。演嗣系之傳言。玄裔萬  
世。全真教主。浩德恩師。大悲大願。  
大惠大仁。  
祖師長春妙道。開玄宏道真人。廣援普  
度天尊。

薩祖寶誥

志心皈命禮

派流西蜀。跡顯龍興。施財合藥濟群生。  
。積行累功修至道。受鐵師之教旨。掌  
玉府之雷書。身披百衲伏魔衣。手執五  
明降鬼扇。代天宣化。咒棗書符。運風  
雷於咫尺之間。翦妖魔於斗罡之下。道  
參太極。位列先天。松筠野鶴任縱橫。  
遐邇彌弧雲常自在。方方闡教。爲萬法之  
宗師。處處開壇。作後人之模範。都天

宗主。一元無上真君。玄風永振天尊。

靈官寶誥 志心皈命禮

先天主將。一氣神君。都天糾察大靈官。  
。三界無私猛烈將。金睛朱髮。號三五  
火車雷公。鳳嘴銀牙。統百萬貔貅神將。  
。飛騰雲霧。號令雷霆。降雨開晴。驅  
邪治病。觀過錯於一十二年。受命玉帝  
積功勳於百千萬種。誓佐祖師。至剛至  
勇。濟死濟生。方方闡教。處處開壇。

豁落猛將。三五火車。

太乙雷聲應化天尊。

救苦寶誥

志心皈命禮

青華長樂界。東極妙嚴宮。七寶芳騫林。  
。九色蓮花座。萬真環拱內。百億瑞光  
中。玉清靈寶尊。應化玄元始。浩劫垂  
慈濟。大開甘露門。妙道真身。紫金瑞  
相。隨機赴感。誓願無邊。大聖大慈。  
大悲大願。十方化號。普度衆生。億億

劫中。度人無量。尋聲赴感太乙救苦天尊。

一願風調雨順。

二願五穀豐登。

三願皇王萬壽。

四願國土清平。

五願民安物阜。

六願福壽康寧。

七願灾消禍散。

八願水火無侵。

九願聰明智慧。

十願學道成真。

十一願諸神擁護。

十二願亡者超昇。

一切飛禽走獸。

一切螻蛄蛇蟲。

一切冤家債主。一切男女孤魂。

四生六道。一切含靈。

聞經聽法。早得超昇。

### 小讚

青華教主。太乙慈尊。玉清應化顯金身。  
大開甘露門。接引衆生。永出愛河津。

### 土地咒

經壇土地。神之最靈。昇天達地。

出幽入冥。爲吾關奏。不得留停。  
有功之日。名書上清。向來晚堂。  
誦經功德。上奉高真。下保平安。  
賜福消災。同賴善功。證無上道。  
一切信禮。志心稱念。  
十方太乙救苦天尊不可思議功德。  
三皈依 志心皈依命禮  
稽首皈依無上道。自皈依無上道寶。當

願衆生。超脫一切。住最上乘。

稽首皈依太上經。自皈依無上經寶。當  
願衆生。深明經藏。神通莫測。  
稽首皈依呂祖師。自皈依無上師寶。當  
願衆生。太上授首。成大仙道。  
晚課功德。不可思議。諸天諸地衆神祇  
。國家壽夭齊。大道慈悲。萬化樂雍  
熙。

朝禮登寶座天尊大天尊（三稱）